

01

《四时赋》

北客长歔，深壁寂思。空床连流，圭霰淹滞，网丝蔽户，青台绕梁。春华虚艳，秋月徒光。临飞鸟而魂绝，视浮云而意长。测代序而饶感，知四时之足伤。若乃旭日始暖，蕙草可织；园桃红点，流水碧色。思应都兮心断，怜故人兮无极。至若炎云峰起，芳树未移；泽兰生坂，朱荷出池。忆上国之绮树，怜故人兮无极。若夫秋风一至，白露团团；明月生波，萤火迎寒。眷庭中之梧桐，念机上之罗纨。至于冬阴北边，永夜不晓；平芜隐海，千里飞鸟。何尝不梦帝城之阡陌，忆故都之台沼！是以轸琴情动，曩瑟涕落。逐长夜而心殒，随白日而形削。故秦人秦声，楚音楚奏。闻歌更泣，见悲已疚。实由魂气怆断。外物非救。参四时而皆难，况仆人之未陋也。

02

《哀千里赋》

萧萧江阴，荆山之岑。北绕琅邪碣石，南驰九疑桂林。山则异岭奇峰，横屿带江；杂树亿尺，红霞万里。水则远天相逼，浮云共色；云云无底，溶溶不测。其中险如孟门，豁若长河；参差巨石，纵横龟鼉。若乃夏后未凿，秦皇未避，崭岩生岸，弊里成迹。驰湍走浪，漂沙击石。伊孟冬之初立，出首夏以归来。自出国而辞友，永怀慕而抱哀。魂终朝以三夺，心一夜而九摧。徙望悲其何及，铭此恨于黄埃。

于时鸿雁既鸣，秋光亦穷。水黯黯兮莲叶动，山苍苍兮树色红。思云车兮沅北，望霓裳兮澧东。惜重华之已没，念芳草之坐空。既而悄怆成忧，悯默自怜。信规行之未旷，知矩步之已难。虽河北之爽垲，犹橘柚之不迁。及年岁之未晏，愿匡坐于霸山。